


KAKÙYI MFRANGÀ ANYÌ

KAKÙYI MUSHINGA WÀ DIFUTA

 Neya bushuwa ne ndyêsè dya kwikala baalukile mu tabernacle, mu dinda emu. Ndi anu ndikonka . . . Mwaneetu Neville uvwa wamba ne bààbûngì kavavwa ne mushindu wa kuumvwa paanyima pààpa to. Nudi mpindyewu mwa kungumvwa bîmpè menemene anyi, paanyima pààpa? Byònsò bidi bîmpè anyi? Eyo. Mêmè ndi—mêmè ndi mukese, pa nanku bikengela ngènzè mutooyi wàbûngì bwa bantu kumanyabo ne ndi mwaba awu.

² Pa nanku, ndi mvuluka musangu kampanda wûmvwà ngenza mudimu ku Midimu ya Mbulamatadi. Mêmè ngenda mbànda bibàndilu . . . Nenku mvwa ne ciibidilu cya kuvwala bisabaata binene bya kacya, biikale ne misonso mu ntaku amu, mfumina ku dyenza dya mudimu ku nshinga ya nzembu ya bukole bubàndile. Nenku mvwa ngenda mbànda bibàndilu. Ki Mandamu Ehalt, udi mulunda wanyi awu, yêyè nguvwa usanganyiibwa ku kazubu kaa dyandamwina mabiikila a ku telefone. Ndi mutwishiibwe ne Mukalenge Ginther wawa mmufwanyine kumumanya, bîmpè menemene. Pa nanku Edith kwambaye ne: “Billy, wêwè udi wenza mutooyi mupite bûngì, wêwè ki muntu mukese wa dikema, ûnkaadiku paanyi mumone wenza nanku.” Mwikale ngenda ntwà mikuma ne bisabaata binene bidi ne misonso mu ntaku ebi, ngenda mbànda bibàndilu abi’s.

³ Mêmè ne: “Ee, Edith, ndi mutambe bukese, bikengela ngènzèku bwa bantu bònsò bamanye ne mêmè ndi mwaba awu, ngènzèku mutooyi wàbûngì’s.

⁴ Ee, mvwa mubwele anu bwa kubiikila. Mwaneetu Neville uvwa mungambile ne mulunda wetu mulenga, Mwaneetu Roy Roberson, mmupumbishe disangisha mu dinda emu, bwalu udi usaama. Wende . . . Ûvwa ne dînú dipàtàmè mu cinyàngànyàngà. Ndikajuule disaamà dya kîshì, ne bimupe ndambu wa mubidi luuya. Nenku bikengela bamutuuledi, ngeela meeji, kabayi bajanguluka to. Ne Roy ùtu mwenze bu taatù kutudi kaaba aka, ne twètù tutu bamunange. Nenku mêmè kwamba ne: “Mwaneetu Roy, ndi—ndi mbwela mpindyewu, anu mu tusunsa tukese emu, nyaaya ku disangisha.” Mêmè ne: “Nèndombè ekeleziya bwa twètù bònsò tukusambidile, mu dinda emu,” nenku maalaba paayaye cyakabidi, bwa kumutuulabo diine dînú adi. Dînú adi dikaadi dilwe dikonyangale, anyi cintu kampanda, ndyashiibwe bibi, nenku bikengela badikose, ne bàdyùmùshè.

⁵ Mwaneetu Roy nkolomu, bu munutu bônso bamanye, wa ku Mvita Miibîdi ya Buloba bujima, uvwabo anu basunsule ne mazaji. Kadi bu kabuyi bwa bwîmpè bwa Nzambi to, nunku yêyè kî mmushaaleku ne mwoyi to. Bakaavwa bamulaadike pambelu munkaci mwa bavwa bafwe, ntanta mule; maboko mambe kutuuka muntwemu, ne mikolo myambe kutuuka, ne tujilujilu tunene twônso tubidi tushipa. Kî ngangabuka kwambaye ne: “Bwa yêyè anu mupànde, kî mmufwanyine kwambulaku dikàsà to.” Ku ngàsà wa Nzambi, ki kwenzaye mudimu dituku dyônso eku, ùbànda kuulu ne bikwabo byônso. Nzambi mmudileeje mwîmpè kudiye bwalu mmuntu mwîmpè, ne twètù tudi bamunange. Ne twètù, katwena—katwena twètù bônso. . .

⁶ Patwikala ne nsòmbelu mujaalame, kî mbwena kwamba ne tudi batwibwe cisàlù cya kubenga kupeta ntatu to. Mu bushuwa bwa bwalu, mbwena kwamba ne ntatu yônso mmituludikila twètù. “Bwalu ntatu ya mwakane yidi yàbûngi, kadi Nzambi udi umusungila ku yôyi yônso.” Ki cibadi cidi cya butumbi ncyôci aci.

⁷ Pa nanku netulombe anu disambila dya pabwadi mu dinda emu, bwa Mwaneetu Roy. Ndi ndikonka ní kudiku muntu muneemu emu, kabidi, udi muswe bwa bamusambidile, udi muswe bwa bamuvulukeku mu mwaku wa disambila? Bu bôbò anu mwa kwela byanza byabo muulu’s. Eyo. Mbîmpè. Twânjì twimanyinaayiku anu kuulu bwa katanci kakese cyanaana, bu nwênù mwa kuswa, patudi tusambila apa.

⁸ Mukalenge, nyewu tulwa leelu ewu, ku mbangilu wa nsabatu eku. Ne dîbà ndyedi dicifuminaku anu ku dyasa lwendu lwadi mpindyewu, bwa kubuuka ne kukosolola buloba, bwa kutwala bukênkè ne mwoyi kudi bintu bididi dilongolwela bwa kwenza nanku. Ne ku mbangilu wa disangisha didi. . . Twètù tudi citupa cya Ekeleeziya Webe, bàdì babiikidiibwe bwa kwenza masangisha a dyondopa, dyondopa dya mubidi bwa mubidi; bwa kukumbaja matekemena ne majinga a Mukalenge wetu mubeneshiibwe Wâkatàpiibwa mputa bwa dishipa dyetu dya mikenji, ne ku mibundabunda Yende tudi bondopiibwe. Nenku tudi baswe kulomba, ku mbangilu wa disangisha eku, pakaadidi dibanga kubuuka ne mapwapwa aadi apa, mu misambu, ne pakaadi myoyi yetu yibanga kutuntumunyiibwa apa, bwa twètù kuvuluka, mu dinda emu, Mukalenge, mwaneetu munanga, wa musinga mukole, Roy Roberson, musadidi Webe mudipwekeshe ewu. Ne tudi bamanye ne Wêwè ngwâkalama mwoyi wende mu cyalu cya mvita, ne muDileeje mwîmpè kudiye. Kadi leelu ewu nyewu usaama ne mwikale mu lutatu, mu mushindu wa kayiku mwa kulwa mu ekeleeziya to.

⁹ Nenku, Mukalenge, pavwabo basambila mu nzubu wa Yone Maako, kwakapweka Mwanjelo mu nzubu wa lukanu, muvwa Peetelo usanganyiibwa muswikiibwe mu nkanu,

kukangulaye biibi, mu mushindu wa kawuyi wumvwika to, ne wakumulombola kuya nende too ne pambelu.

¹⁰ Éyì Mukalenge, Wêwè's ucidi anu Nzambi. Banjelo abu's badi ku bukookeshi bwa díyì Dyebe mu dinda emu. Tudi tulomba, Mukalenge, bwa ne patudi munkaci mwa kusambila mwab'ewu mu nzubu wa Nzambi apa, Banjelo bapweke kwa Mwaneetu Roberson. Dijinga dyende ndya kwikala pa kaaba kende mwaba ewu, kadi lutatu ndwalu lwamulaminyinyi panshi. Nenku swaku bwa Banjelo baa Nzambi bamusungile, bamusangaje, bwa wamona mwa kwangata cyakabidi kaaba kende mu nzubu wa Nzambi.

¹¹ Kudi bakwabo badi bapicile mu maalu makole, badi—badi basaame. Ne tudi bamone mukaji mukole, pakaavwaye ne asombe pa nkwasá wende, umbá wela byanza muulu, pavwaye wenda utetuka ku makàsà ende apu. Mmulwe mu nzubu wa Nzambi, bwa kwondopiibwaye. Enzaku, Mukalenge, bwa apatuke wenda wendela kuulu, mu ditupika ne bwânà bwa mukaji mutekete.

¹² Bakwabo bônso badi beele byanza byabo muulu baba, byàbúngì mbyediibwe muulu, bwalu baakafunda, ne mbyebi bikaavwa biteediibwe kumpala aku ne: “Ntatu ya mwakane yidi yàbúngì, kadi Nzambi udi umusungila ku yôyi yônso.” Swaku bwa tubuuke tuye leelu ewu tubwele mu diitabuuja, mu maboko a diitabuuja, ikala mwa kutusungila ku mabeedi ônsò ne ntatu. Piikala disangisha dijike, swaku bwa kakwikadiku muntu nansha umwe ne butekete munkaci mwetu to.

¹³ Enzaku, Mukalenge, bwa mwena bupidya yônso alwe mwena kwitabuuja. Ne patucidi twelangana meeji pa Díyì Dyebe apa, swaku bwa Nyuma Mwimpè aDyângatè ne aDibweje mu myoyi yetu, ne mwômò amu aDimyamine mâyi too ne paalwaDi mamuma a Díyì. Twènzèlèku cyòci eci, Mukalenge, patudi twinyika mitu yetu ne kudipwekesha kwônso ne tulomba nunku mu Dína dya Yesu apa. Amen.

Nudi mwa kusòmbaayi.

¹⁴ Kumpala menemene kwa mêmè kubwela mu diyishi dya disangisha bwa mu dinda emu, ndi muswe kunumanyisha, kunusemejaku pabwipi ndambu. Kwòkò kwikale bamwe baa kunudi aku badi bangate diikisha, ne baswe bwa kulwa mu dimwe dya ku masangisha ikalà mwa kwenjiibwa mu Middletown, mu Ohio, ikalà mwa kubanga mu dimwe, dya lumingu lukwabo lwalwa, neikalè mu cituudilu.

¹⁵ Udi mumanye mene dína dya cituudilu aci anyi, Gene? [Mwaneetu Gene udi wamba ne: “Mbambe ne muvwa mmu ntanta wa kilomeeta dikumi ne citeema pambelu paa Middletown.”—Muf.] Mwaneetu Sullivan. Middletown nkaacimenga kakese, ngeela meeji ne anu bu mudi Jeffersonville emu. Cidi mpwilààmàmbò wa manayi a ndundu wa dyela mu

tubondo. Mwaneetu Sullivan ngudi mpaasata wa mwine amu. Ne umwe wa ku ekeleeziya ya Evanjeeliyo mu Kaabujima ayi, ya bwalu yidi makumi asambombo ne bya mu njila miikale yikwacishangana mu mudimu mu disangisha diine edi, yèyè ngwíkala ne mushindu wa kunwambila ne cituudilu aci cidu mwaba kaayi.

¹⁶ Nenku nekwikale tuzùbu twàbûngì mu cituudilu amu, mudibo bangambile, bwa kukuba bantu badi baswe kulwamu. Nenku masangisha neabange mu dimwe aya too ne ku diisambombo, matuku asambombo. Kadi kaàkwikala mu dyalumingu to, bwa ekeleeziya mikwabo ayi, bwa baamona mwa kuya kenza masangisha abo a ciibidilu. Pàmwápa, nekwikale masangisha a dyondopa, anyi disambidila babeedi, diloolo dyônsò. Nenku muntu yônsò mmubiikidiibwe. Nenku nebibange mu matuku 10 a ngondo wa mwandamukulu, too ne ku matuku 15, ku dimwe too ne ku diisambombo. Nenku pawikala mwangate diikisha, ne—ne mwikale ne diikisha dyebe kumpala eku, ne mwikale ujinga kudipicisha mu mushindu ewu, ee, ncyá bushuwa ne tudi bafwanyine kwikala ne disanka dya twètù kwikala neebe.

¹⁷ Ndi muswe kabidi kukolesha ku mwoyi bônsò batu kabayi babatijiibwe mu dibatiiza dya bwena Kilisto, bwa kushaalabo mu dinda emu ne kwelanganapu meeji. Nenku ikalaayi badilongolole ku mudimu wa dibatiizangana wikala mwa kulonda mu tusunsa tutwe ku makumi anaayi ne tutaanu mpindyewu etu, ngeela meeji. Aci neciikale apa ku ekeleeziya eku.

¹⁸ Tudi ne meeji matuma ku dikolesha bantu ku mwoyi bwa bôbò kubatijiibwa mu dibatiiza dya bwena Kilisto, bu mutùdì bamanye ne ki didi ne mushinga munene bwa lupandu. Bwalu ki cyakafundiibwa kudi Mukalenge wetu, mudimu Wende wa ndekeelu mutùmangana naawu, mudimu Wende wa ndekeelu mutuma naawu Ekeleeziya. Anyi, paakatumaYe Ekeleeziya ne mudimu, musangu wa ndekeelu awu, Wakamba ne: “Ndaayi pa buloba bujima, nuyiishe cifukiibwa cyônsò Evanjeeliyo. Ewu wítabuujá ne wabatijiibwa awu neasungidiibwe.” Pa nanku tudi bamanye ne mbya mushinga munene bwa twètù kubatijiibwa mu kwinyijiibwa kwa mu mâyi.

¹⁹ Nenku netwikale ne disanka dya kunukwacila mudimu ewu, kudi ewu yônsò udi mutwishiiibwe munda mwa mwoyi wende ne Yesu Kilisto udi Mwânà wa Nzambi, ne Wakafwa bwa kusungila bangenzàmpèkààtù, ne wèwè peebe udi umwe wákafwilàYè bwa kusungila; ne mwikale muswe bwa kulwa kubatijiibwa mu Dîná dya Yesu Kilisto bwa dilekelediibwa dya mpekaatu yebe; mwikale wamba, wambila baa pa buloba ne, udi wítabuujá ne mpekaatu yebe mmilekelediibwe, ne mpindyewu neulwe muyiidi wa Mukalenge Yesu, bwa kwangata kaaba keebe.

²⁰ Pawikala kuyi ne ekeleeziya wa kwikala kuya, netwikale ne disanka dya wêwê kwikala neetu mu bwobumwe. Apa katùtu twètù ne bidimba to. N'tabernacle muunzulula, bwa Mubidi mujima wa Kilisto, bwa dingumba dyònsò. Twètù tudi biimane bu bàdì kabàyi basungulujangana bilondeshile mangumba. Ne tutu tuunzulwila bantu bònsò biibi, nansha bòbò biikale banganyi, diikala, cisà, anyi twitabaayi, bantu bònsò tudi tubaakidila bilenga. “Ewu yònsò udi muswe, alwe.” Nenku pawikala kuyi ne ekeleeziya mukwabo to, tudi babafwanyine kwikala anu ne disanka bwa wêwê kulwa ne kwikala neetu mu bwobumwe. Kakwena cintu nansha cimwe cya ne washaadi wa mwómò emu to. Bwela wêwê anu cyanaana padi biibi byunzulula apu, ubwele neetu mu bwobumwe. Ki cyònsò cidi cikukengela; lwâku wêwê anu mushindu awu. Ulwe ne mwoyi muunzulula, utwe makaaya ebe ku lukata, nenku utukwacishe patudi twenda tuya kumpala bwa bwalu bwa Bukalenge bwa Nzambi apu. Bwalu, tudi cya bushuwa twitabuuja ne, dîbà dikaadi pawîpi, diikalà bintu byònsò byakambiibwa mu Bible ne cya kuula.

²¹ Kakuyi mpatà to bààbûngì baa kunudi bakaadiku babale Khrushchev, diyì dyende divwaye mwambe ku O.N.U., dituku adi, muvwabo badinteelele mu cibejibeji kampanda cya beena Canada, kudi mulunda wanyi mukwabo. Mwambe ne: “Kwòkò kwikale Nzambi, Ûkaadi pa kuumusha manyaanu ne kusukula cyakabidi ntempelu, ne nwênù ba-capitalistes aba, mwakenzaYe ku cibangidilu amu.” Pa nanku mpindyewu's nudi mwa kubala munkaci mwa milongo amu ne: “Ûkaadi pa kuumusha cyakabidi manyaanu mu ntempelu.” Nenku cidi cibi menemene ncyane, communiste ngudi mufwanyine kwamba cintu bu nanku awu anyi? Yêyê uwwa ne cintu kampanda, nansha nanku. Ncyane bushuwa. Bavwa mba-capitalistes, ku cibangidilu aku, bààkakèbà lutatu alu. Twètù's ki biine ba-capitalistes abu.

²² Mvwa muumvwe mpaasata wetu, mpaasata wetu munanga ewu, Mwaneetu Neville, wamba cintu ku télévion wende. . . anyi ku tudyomba, dinda dikwabo, cìvwa cinshaale misangu ne misangu, mu meeji. Ncyèna anu mwa kucipwaku mwoyi to. Mvwa muciteelele mulunda wanyi mukwabo, makeelela awu diloolo. Ne cyòci ciine civwa ne, nekwikale. . . Paanyima paa dyumushiibwa dya Nyuma Mwîmpè, pa buloba, ntendelelu wa kwisùkwisù wa ekeleeziya awu neatungunuka anu kutungunuka, kabayi bamanya dishiilangana to. Kacya nwênù, nukaadiku. . . Mbanganayi bavwa bumvwe aci? [Disangisha didi dyamba ne: “Amen.”—Muf.] Aci kacivwaku cikemesha bwa kuciitaba anyi? Bòbò kî mbamanye Nyuma Mwîmpè to, pa nanku kabaakumanya ne ndîbà kaayi diikalaYe muye to, nenku nebiikale anu benda batungunuka anu mwabo ne kale. Piikala muntu wa ndekeelu mwa kutwibwa citampi mu Mubidi wa Kilisto, bòbò nebiikale anu kacya baatungunuka, bateeta bwa kufikishaKu badi bakudimune mucima, bwalu kî mbamanye ne

Cyôci ciine ncinyi to. Ne ntendeleelu yabo ya kwisùkwisù ayi neyiikale yenda yitungunuka anu mwayi ne kale. Mpindyewu, cìdi mwa kwikala kaciyi cinubwela muvwaci cimbwele mêmè to, kadi civwa ndiyi dya dikemesha. Bwa ne, bôbô nebiikale kule menemene, anu mu mishingà ya ntendeleelu, mu mushindu wa kabàyi bajingulula ne Nyuma Mwîmpè mmuye to, bwalu kî mbamanye ne cidiYe ciine ncinyi to, twamb'eku twamb'eku.

²³ Nzambi ikaleku neetu luse. Mwaneetu, ndi mêmè muswe kwikala ne mwoyi mu mwoyi wa panu ewu, ne dijinga dyanyi, mu mushindu wa ne nansha kwenzèke diMubungamija nansha dikese menemene, ndimanyeku mu mwoyi wanyi. Bu mêmè mwa kwenza cintu cya cifwanyine kuMubungamija, ngiikalèkù ne mushindu wa kucyumvwa anu mu katanci kakese aku.

²⁴ Kadi, kwambi bwa Yèyè kayipu to; mêmè ncyèna muswe kwikala apa piikalaye Yèyè kayipu to. Ndi muswe kwikala mumane kuya, dîbà adi, eyowa's, mukalenge, bwalu kakwakwikala Mashi pa nkwasà wa ngàsà to. Nekwikale mîdimà ne mîshi ne kufiike. Mwaba wa cijila kawakwikala ne Mwakwidyanganyimu to, bwa kwakula bwa bwalu bwetu pa diine dîbà adi. Nudi bamanye ne Mifundu yidi yamba nanku anyi? Mwaba wa cijila uvwa ufwima mîshi. Kakuvwa Mashi pa nkwasà wa ngàsà nansha, pa dîbà adi cikaadi cilumbulwidi.

²⁵ Bu Mukalenge, misangu mikwabo ku mbangilu kwa muvù wa mabeji apoopoka ewu, mwa kutupaku ditabuluja dya ndambu wa maloolo. Ndi anu mudilongolweleci mu meeji aanyi ne, ndi muswe kwangata Mukanda wa Bwakabuulwibwa awu, bwa diwulonga, kuya anu buludi too ne mu ndondo wa Mukanda wa Bwakabuulwibwa awu, kutungunuka.

²⁶ Mpindyewu, leelu ewu, ndi mumanye ne kudi bààbúngì badi babwela, bwa kubasambidilabo. Ne bìrô byanyi bivwa bikanga leelu ewu, anyi lumingu elu. Ne bamwe baa ku bantu bavwa balwe, kabayi bapete mushindu wa kubasambidilabo to, kwôkù aku, bwalu nsongaalume eyi yikaavwa mimane kuumuka miye, bwa dituku dijima anyi cintu cya bu nanku, bwa kwikisha. Badi ne mudimu mupite búngì wa dyenza; mudimu wabo bôbô biine, kusangishilaku ne mudimu wa tabernacle, ne mabiikila aanyi a ku telefone ne bikwabo byônsò. S'bidì byumba bikupa ne dîsaamà dya mutu. Nenku ki kabingila nkôkò aku. Ndi mumanye ne bidì bikengela bwa ngiikale mpatuka nyaku mwaba kampana, ku musangu ne ku musangu, bwa kwenzaku cintu kampana cya cishiilangane, ne ndi mumanye ne ki cidì cibakengela, bôbô paabo. Pa nanku, kumbiikilabo. Mêmè kwamba ne: "Ndi ngeela meeji ne mbifwanyine kwikala bîmpè." Nenku netusambidile babeedi, mu katanci kakese emu.

²⁷ Nenku mvwa ngeela meeji ne tudi bafwanyineku kubala cintu kampana mu Dìyì dya Nzambi. Panwikalà ne Bible mpindyewu, tubuululaayi mu Mukanda wa Yeshaayi. Ndi

muswe nnumonaku nwangata Mukanda wenu, nuWubala. Ndi mbala . . . Nwènu nupetaku anu Dìyì dimwepele anyi abidi atudi tubala, nansha nanku, Didi n'Dìyì dya Cyendelelele dya Nzambi, Dìyì didi kadiyi difwa adi. Kadyena mwa kujiminaku to. Nshapita wa 55 wa Yeshaayi, cyena-bwalu ne: “Lupandu lwa kashidi.”

Monaayi, ewu yònsò udi ne nyoota, lwâyi ku mâyi, ne ewu udi kayi ne mfranga; lwâyi, nusumbe, ne nudye; eyowa, lwâyi, nusumbe mvinyo. . . mabeele kakuyi mfranga ne kakuyi mushinga wa difuta to.

Bwa cinyi nudi nutuulakaja mfranga ku cidi kaciyi dyâmpà? ne mudimu wenu mukole bwa cidi kaciyi cisankisha? Nteelejaayi ne lukunukunu, ne dyayi cidi cimpè, ne lekelaayi musuuka wenu usankile mu bya maanyi.

Inyikaayi dici, ne lwâyi kùndi mêmè: teelejaayi, ne musuuka wenu newikale ne mwoyi; nenku nêngênzè neenu cipungidi cya kashidi, nansha mene luse lujaalame lwa Davidi.

²⁸ Ndi njinga kwakulaku neenu, anu bwa katanci kakese cyanaana, pa cyena-bwalu eci: *Kakùyi Mfrangà Anyì Kakùyi Mushinga Wà Difuta.*

²⁹ Kudi bintu bicyonkomojanyani bûngì cyanaana bya matuku etu aa. Kudi byàbûngì be bya kuseeswisha naabi bantu bitudi bafwanyine kubiikila ne “mbisankasanka,” ne biine abi mbwa bantu bònsò, bònsò ne bakole ne bânà.

³⁰ Kudi biseeswishi bwa bansonga, maja a cyena leelu ne maafêtes a bidùndadùnda, ne mijiki yidibo naayi yidi yenda naabi pamwe. Ne byònsò abi bidi anu biseeswishangana, bwa kucyonkomojangana.

³¹ Nzubu udi mwânà mukoleshiibwemu nansha mwikale mulenga wa bishi, ne nansha bamulongeshe mwa kwenza maalu mîmpè bishi; mwânà awu yêyè kayi mwitabe dilabula dya Dilediibwa dya cyakabidi to, mijiki ya bidùndadùnda ayi yidi yikoka ntema yende ne lukasa lwònsò anu padiye uyumvwa apu. Bwalu, mu yêyè amu, mu yêyè amu mmulediibwe, ku bufuki, nyuma wa musunya. Ne bukole bwa dyabulu mbunene menemene, leelu ewu, mu mushindu wa ne budi bukwata nyuma wa mwânà mukese awu.

³² Kadi amba tûng mwabengabu kutamba kukwata muntu mukole, dîbà adi, udi mudyombole Dilediibwa dya cyakabidi awu! Bwalu, anu nsòmbelu webe yêyè mushintuluke, ne wêwè mukudimune mucima ne mulediibwe cyakabidi, mu Bukalenge bwa Nzambi, ngiikadilu webe neatungunuke anu ne kwikala wa bintu bya pa buloba, nansha wêwè mwikale mutendeleedi wa bishi, amba anu cyòci aci cishintuluke munda mwebe.

Udi mufwanyine kukuukwila ne kwikala mutendeleedi, kadi aci necitungunuke anu ne kwikala ne bukole bwa dikoka bwa mushindu kampanda kûdi, bwalu muntu mukulukulu wa mpekaatu ewu ne majinga ende kî mbyanji kufwa munda mwebe to.

³³ Kadi Kilisto adidinge anu angate nkwasa wa butumbi mu mwoyi webe amu, bintu abi kabyena bitacisha to. Ncitambe kwikala cinene be.

³⁴ Ncyêna mwa kuteela dînà dya muntu awu to, bwalu ncyêna mwa kuvuluka dînà dyende mpindyewu to, kadi bààbúngì baa kunudi nebamuvuluke. Badi bamba ne kuvwa cisanga kampanda kùvwà bantu baya, bwa kubucikilangana, ne bantu bakaji bavwa bapatuka, benda bimba misambu. Kadi misambu yabo ayi yivwa yilobeshangana bikole, mu mushindu wa ne beena mudimu baa ku mazuwa a màyi bàvwà bàpicilà mwaba awu abu, mu mazuwa, bavwa balwamu. Nenukù dîbà adi basalaayi babucikidyanganyi abu bavwa mwa—bavwa mwa kukwata beena mudimu baa ku mazuwa abu kuya naabo kule ne balami baa mazuwa, ne kubashipa. Nenukù muntu munene kampanda wakaswa bwa kupicilamu. Ki kwambilaye beena mudimu bende baa ku mazuwa abu bwa kumuswikilabo ku dikunji kampanda divwa diimane, ne—ne—ne kumwela cintu kampanda mukana, bwa kamonu mwa kwela mbila to; ne—ne kupayika bijiku mu maci a beena mudimu bende baa ku mazuwa abu, bwa kabamonu mwa kuumvwa, baaseemenaku ne mazuwa, bwa kubyumvwabo to. Ki bakaji abu kupatukabo, benda baja maja ne—ne beela mbila ne bimba misambu, nenku, kaa, bivwa bilenga byebe bya dikema, mu mushindu wa ne wakadifyonona dikoba pa manungu a byanza, wela beena mudimu bende baa ku mazuwa abu mbila ne: “Kudimunaayi mazuwa nuyemu! Kudimunaayi mazuwa nuyemu!” Kadi bôbô kabayiku mwa kuumvwa to, bavwa ne bijiku bipayika mu maci.

³⁵ Ki pashiishe kuyaye ne mazuwa mu mwaba kampanda uvwabo ne cya kumusuulula ku dikunji, anyi, kumukutulula byanza, ne bikengela kubuumushabo bijiku abi mu maci. Mwaba awu, pavwaye wenda wendakana mu misèèsù, kuumvwaye mwimbi kampanda wa mijiki uvwa yèyè wa njajama kutamba bivwà kwaka naka abi, mu mushindu wa ne paakapicilaye cyakabidi mwaba mwine awu, kwambabo ne: “Kaa, mutambakanyi munene wa mu ngendu, bikengela bwa tukuswikile cyakabidi ku dikunji anyi?”

³⁶ Yèyè kwamba ne: “To, ndekelaayi kanuyi banswike to. Ndi muumvwe cintu kampanda cya citambe bunene, mu mushindu wa ne aci cyaakuntacishaku kabidi to.”

³⁷ Mushindu awu ki udibi bwa mwena Kilisto mulediibwe cyakabidi. Yèyè mmupeta cintu kampanda cinene menemene kutamba bidùndadùnda ne bicyonkomojanganyi bya pa buloba

ebu abi. Ùdi yêyè ucyonkomojiibwa kudi Nyuma Mwîmpè. Ncitambe bunene menemene, mu mushindu wa ne maalu a pa buloba mmafwe bwende yêyè.

³⁸ Kadi paudi uya ku cicyonkomojanyani cya ciipanshi eci, udi ne cya kuvuluka ne bidi bikukengela kutuula mfranga bûngi cyanaana. Nsongaalume udi uya ne mulunda wende wa bakaji ku maafêtes aa ne maja aa, ne bikwabo abi awu, neikale ne cya kwikala utuula lupetu lupite bûngi lwa ku mudimu wende wa ku lumingu ne ku lumingu. Ne bantu bakole paabo bàdi bàteeta bwa kupeta disanka dya kwikala kuya mu mangàndà a bière, kukwacika bwa kupwa mwoyi tunyinyanya twabo tya mu lumingu abu, nebiikale ne cya kutuula mfranga bûngi cyanaana. Ne bôbô biine cidibo bapetaku ncinyi? Kabeena ne cidibo bapetaku nansha cimwe to anu mâsaamâ a myoyi.

³⁹ Kadi wavuluka ne, nebikengela bwa wêwè kututakeena ne Nzambi dîngà dituku bwa bwalu abu. “Ne difutu dya mpekaatu ndufu.” Kwêna ne cyûdi upetaku panu pa buloba to, ku cyôci aci. Cidi mmâyî a bakishi a mashimi. Dinwa dya maala nedisakidile anu tunyinyanya ku tukwabo. Mpekaatu neasakidile anu lufu ku lufu lukwabo. Keebe kabeji kaa shekè kaa ndekeelu nekiikale ditapuluka ne Nzambi, Cyendelele, ukabwela ne mu Dijiba dya Kapyà. Ne wêwè kwêna mwa kupetaku cintu nansha cimwe to, anu kujimija.

⁴⁰ Pa dîbà adi Nzambi udi ulwa wela lukonko elu ne: “Bwa cinyi nudi nutuulakaja mfranga yenu ku bintu bidi kabiyi bisankisha mu bulelela abi? Nudi nucyenza bwa cinyi?”

⁴¹ Ncinyi cidi cisaka muntu ku dijinga kucyenza? Ùdi utuulakaja byônsò bidiye naabi, byônsò bidiye mwa kupeta, bwa kusumba maala a kunwa, bwa kuvwadika mukaji kampanda udiye wenda nende masandi, anyi bisankasanka kampanda bya pa buloba, bya nkuka.

⁴² Kadi mbatwâmbile mu Bible, ne batutumine dîyi bwa twêtù kulwa kudi Nzambi ne: “Nenku bwa kusumba disanka dya Cyendelele ne Mwoyi wa Cyendelele, kakuyi mfranga anyi kakuyi mushinga wa difuta.”

⁴³ Bintu abi kabyena mwa kusankishaku mu bulelela to, ne ndekeelu wabi ndufu lwa Cyendelele. Ne ciine aci cidi cikwangata mfranga yônsò yûdi mwa kukungwija, bwa kwikala muntu wa mushinga mu—munene anyi mucyokomojanyani, anyi nsongaalume mwenji wa bikàsà, anyi cyônsò cyûdi mufwanyine kwikala aci, anyi nsongaakaji wa mumanyike, anyi nî ncinyi cyônsò. Cidi cyangata byônsò byûdi mwa kukungwija, bwa kwenza ciine aci. Kuvwala mvwadilu wa mutambe kutumbuka ku mvwadilu yônsò awu, ne—ne kwenza bintu bidi baa pa buloba benza, anu bwa kunowa kabeji kaa shekè kaa dipiishiibwa dya Cyendelele.

44 Nzambi mmwambe, pa dîbà adi, ne: “Bwa cinyi?” Citwenza ncinyi ku Dituku dya Cilumbulwidi, paatukonkabo ne mbwa cinyi twâkenza cyôci eci? Dyandamuna dyetu nediiikale cinyi? Dyandamuna dya Amerike wa cyena leelu udi wamba mudibo ditunga dya beena Kilisto ewu, nediiikale cinyi? Ne kudi mfranga mipite bûngî yidi yituudiibwa ku whisky, mu cidimu cimwe cyanaana, mipite yîyaayà ku byakudya. “Nudi nutuulakaja mfranga yenu ku bintu bya mushindu awu bwa cinyi?” Kadi paabi, mbulamatadi’s mmufwanyine kukwela mu buloko, bwa ndola yetu yitaanu eyi yivwa yikengela kufuta citadi kadi wêwè pâmwăpa muyitumine bulongolodi kampanda buvwa kabuyi buteekiibwe bulongolwela dyangata dya bitadi mu mushindu mukumbane to, bwa kutuma missionnaire kampanda dyamwamwa dya mbû. Baadyakutukonkaku dîngà dituku ne: “Nwâkacyènza bwa cinyi?”

45 Twêtù tudi ditunga dya beena Kilisto, kadi miliyaalà ne miliyaalà yidi yitumiibwa kudi bantu badi kwaka baba, batudi takeba bwa kusumba bulunda. Patudi twakulangana apa’s ki bôbô kucidyombolabo eku. Kabyena bikemesha to padi Khrushchev mwambe ne: “Kwôkô kwikale Nzambi, Yêyè neakombe cyakabidi mu nzubu Wende wa bukalenge bwa kumutookesha.” Bampangaanu badi mwa kwamba mêyî a mushindu awu, s’mbwa kutufwisha bundu. Cintu kaayi cya bucimbe! Kadi twêtù tudibiikila peetu mutudi beena Kilisto.

46 Nzambi mmwambe ne: “Lwâyi, nusumbe Mwoyi wa Cyendeleele, kakuyi mfranga, kakuyi mushinga wa difuta.” Mwoyi, bwa kwikala ne mwoyi kashidi, kadi tudi tukomaKu nyima ne tukenya ku mênù baMutangile mumpala. Citwenza ncinyi mu Dituku adi? Ciikalaku ncinyi. . . ?

47 Piikalabi ne Nzambi ngudi utupa bintu bya dyenza, ne utupa mfranga, ne utuvwija ditunga didi ditambe kubanjika dya mwinshi mwa maulu, pa dîbà adi’s Nzambi neakonke ne ncinyi citudi benze naayi. Tudi tutuula mfranga yetu ku bintu bidi kabiya bisankisha mu bulelela bwa cinyi? Kabiya anu bwa ditunga to, kadi neciikale bwa muntu ne muntu nkaaya; kuumukila ku meeyà, too ne ku mîlîyô ya ndola, yîikalà muntu ne muntu mupeeshiibwe.

48 Padi bantu bashipangana muntu ne mukwende: Mwva mubale kaabwalu kampanda anu abidi adi panshi aa, muvwa nsongaalume yibidi yikwata mudimu mu kamponyi kaa ditwa dya buluwà. Umwe uvwa ne bânà bataanu, mukwabo uvwa naabo babidi. Kadi umwe wa kudibo bivwa bikengela kuumumushabo ku mudimu. Kadi umwe wa ku nsongaalume ayi uvwa ne bânà babidi awu, anyi uvwa ne bânà bataanu awu, kudyumvwaye ne yêyè nguvwa ukengela mudimu awu kutamba uvwa ne bânà babidi awu; ki kuyaye nende mu ditwa dya buluwà, ne kumulonzaye mu mwongo.

49 Mfranga, mushindu wa ditunga ngwôwò awu, mushindu wùdi bantu badyumvwa ngwôwò awu, mushindu wa nyuma udi ukookesha bantu ngwôwò awu.

50 Pa dîbà adi's nudi mwa kumona mudi Dilediibwa dya cyakabidi diikale dya mushinga munene. "Udi ne cya kulediibwa cyakabidi." Didi ne cya kwikala nanku. "Lwâyi kûndi Mêmè, nusumbe kakuyi mfranga to."

51 Kwêna mwa kwamba ne: "Mêmè ncivwa ne mfranga" to. Kabyena bikukengela mfranga miine to. Mbifidiibwe cyanaana.

52 Twêtù beena Amerike tutu ne etu meeji matuma anu ku didisumbila twêtù biine kantu ne kantu. Ki cyetu cikemu ncyôci aci. "Tudi tudisumbila bintu. Bwa mfranga twêtù mbadi naayi." Biikale tudileeja ne tubeji twêtù twa ndola atu kùdi matunga makwabo, a malanda awu, ne bikwabo. Babwelamu, umona beena ngendu ya dibandila dya myaba abu balwamu, bônso bavwale ne ku mênù ne byakane. Beena Amerike babazakeela. Cintu aci mmfranga ya bukooya ku mêsù kwa Nzambi. Aci kacyakusumbakù njila wetu wa ku Dyulu nansha. Kadi bintu byônso mu Amerike, bikengela twênza maalu ônsò anu ne mfranga yetu twêtù.

53 Uya ku nzubu wa cidiilu, udya didya dyebe adi. Kadi wêwè kuyi muteeke mfranga pa meesa, bwa kupeesha nsongaakaji mwena mudimu awu matapishi to, ùdi ùkànga mpala, piine apu's mpaanyima paa yêyè mumane kufuciibwa kudi kumpanyi udiye ukwacila mudimu awu. Ne ciine aci bivwa bikengela kwikalaci dikumi pa lukama piikalabi ne ncishaadile, anyi cipite apu, cya mfranga yùdi ne cya kufuta ayi. Kuyi mwenze nanku to, nsongaakaji awu neakwoshe dîsù dya ukubedya wêwè mwenze bu mukonkoto anyi muntu kampanda wa—wa minu mikole. Kadi paabi, yêyè's utu upeta mfranga yende. Mêmè ndi ngeela meeji ne ndibùlâ dya ngâsà ne cintu cya bundu, bwa kucyenza. Ngeela meeji ne ndijingulula dya dishaadile didi naadi ditunga edi. Kale wâwa, bantu bîmpè, mu myaba ya mîmpè, kabavwaku bafwanyine kwanyisha aci to. Kadi bikaadi byônso byenda bibwela mu nyuma munene umwepele.

54 Mvwa nya mu lwendu kampanda, mu kàwulù. Nenku mwambwidyanganyi kampanda wa majitu...Mvwa ne kaadiplomate kakese ku cyanza, ne musheete wa bilâmbâ ku cikwabo cyanza, ne kabuta kaanyi kaa bya dikungula naabi myedi mu dyâpâ, ngenda nya. Mwambwidyanganyi wa majitu awu kulwaye kûndi, kwamba ne: "Ndiku mwa kukwambwilabi anyi?"

55 Mêmè ne: "Kaa, s'nyaaya anu ku kàwulù kwaka, mukalenge. Twasakidila, wa manza tente." Ntanta anu bu, kaa, wa mêtres makumi asatu cyanaana.

56 Yêyè ne: "Ndi muswe kubyangata," ki kwangataye tuntu tukese atu ne kutwambulaye, kwasaye lwendu.

⁵⁷ Ee, paakalwaye, mêmè mvwa mudyāmbidile ne: “Pāmwāpa mvwa . . .” Mvwa mumanye ne ùvwa ufuciibwa, nenku mêmè nēmupèèshèku anu—nēmupèèshèku anu cyabibidi cimwe cya ndola. Ùvwa pāmwāpa, mungambwile bintu byanyi abi, mu ntanta bu wa, twāmbè ne, kasunsa kamwepele; ntanta bu wa apa ne ku ndekeelu kwa tabernacle ewu eku, kwākabāndāye mu kàwulù aku. Mêmè kubānda mu kàwulù, kumpala, nenku mêmè kwolola anu byanza e kubyangata. Mêmè kumupeesha cyabibidi cimwe cya ndola.

Yèyè ne: “Anji indilabi tǔng!”

Mêmè ne: “Ncinganyi’s, mukalenge?”

Yèyè ne: “S’ngakwambwidi mabuki asatu!”

Mêmè ne: “Eyowa’s, mukalenge, ncya bushuwa. Bwalu, bwalu mwaba awu budi penyi?”

⁵⁸ Yèyè ne: “Wanyi mushinga wa mushaadile menemene ngwa meeyà makumi abidi ne ataanu ku dibuki. Washaadi ne dibanza dyanyi kùdì aku dya meeyà makwabo makumi abidi ne ataanu.”

Nwamonu’s, s’ki cyena Amerike ncyôcì aci, kantu ne kantu kônsò bikengela anu kukafucila.

⁵⁹ Upātuka wenda uya mu kashinyi keebe kadi kadidinge anu kadishinde mu mukidi, kadi ulomba muntu bwa akukoke akupatulemu. Bidi bikengela wikale mudilongolole bwa kufuta, bwalu nebakufucishileci. Mashinyi àtù àpātulanganàmu awu wôwò anu malwe ne makupatule, mwenawu neakufucishe bûngì kampanda ku kilomeeta yônsò. Kadi mwena ferme yèyè, misangu citeema pa dikumi, bwa yèyè anu mukapatule katumba kende aku, s’nebiikale bibi bipite ne apu.

⁶⁰ Bikengela ufute bwa kantu ne kantu kaudi wenzeja. Byônsò bidi anu “Futa! Mfranga! Futa! Mfranga!”

⁶¹ Kadi paabi mmukidi kaayi mutolmbe bunene udi mpekaatu mukwele wèwè awu! Nganyi udiku mufwanyine kukupatula mu mukidi wa mpekaatu amu? Kadi Nzambi udi ukupatula mu mukidi wa mpekaatu awu, kakuyi mfranga, kakuyi mushinga wa difuta, padiku kakuyi muntu nansha umwepele mufwanyine kukupatulamu to.

⁶² Paudi kuyi ufuta mushinga mukole bwa dikukoka dya mashinyi àtù àpātulanganàmu awu, wèwè’s neushaale mu mukidi amu. Bikengela wikale ne mfranga bwa cyanaana udi ushaala mu mukidi amu.

⁶³ Kadi mukidi udi mutambe bubi wûdiku mubwele, ngudi dyabulu mukwele mu awu, mukidi wa mpekaatu ne bupidya. Nzambi neakupatulemu ku budiswîlè, kakuyi mfranga, kakuyi mushinga mukutwila. Kadi nansha nanku wèwè udi anu usanganyibwa mu mukidi amu, mwikale anu wenda upaata mu mpekaatu, kuyi nansha uMusokaku Yèyè to.

⁶⁴ Paudi upatwisha mashinyi àtù àpàtulanganàmú awu, pa ciibidilu batu beelaku munyoololo munene bawupwekesha too ne munda mwa mukidi amu, bawùjìngila ku cikandiki cya kashinyi aci anyi mwaba mukwabo, ne babanga kwenda kunyenguvula manuvele. Nenuku bukole bwa mashinyi awu bubanga kukoka, ne myoteela bibanga kudila, nenku bikukoka bikupatulamu.

⁶⁵ Padi Nzambi ukusangana mu mukidi wa mpekaatu, ne uumvwa wèwè uMusoka, Ûdi upwekesha munyoololo wa bwena uvwa mujìngile ku Kalvariyo awu, dinanga dya Nzambi adi, ne uWupayika ne ndobo ku mwoyi webe, ne welamu Bukole bwa Nyuma Mwimpè, bwa kubanga kukoka. Ne ciine aci kacanya cikulomba mushinga kampanda nansha umwe to. Kadi nansha nanku twètù tudi anu kacya twashaala mu mukidi bwalu katwena mwa kucìsùmba ne bya mu mpaaya yetu to. Twètù beena Amerike tutu twela meeji ne tudi mwa kucìsùmba ne bya mu mpaaya yetu, kadi kanwena mwa kucyenzaku to. Neya kakuyi mfranga anyi kakuyi mushinga wa difuta to. Kwèna ucìsùmba ku ekeleeziya to. Yesu wakacifuta ku Kalvariyo. Kadi bantu badi baCyumvwa bundu. Mbaswe bwa kwikalaCi mu mushindu wabo bôbò. Nzambi udi ne mushindu wa wèwè kuCipeta, ne Cyôci neya dipeta cyanaana pawikala muswe kuCyangata.

⁶⁶ Pa ciibidilu, padibo bakukoka bwa kukupatula mu mukidi, udi mufyondoke pambidi pajima, bikengela bwa wèwè kuya mu lupitaadi. Ne kumpala kwa kukwatabo mudimu pambidi peebe apu, kumpala kwa cintu nansha cimwepele kwenjiibwaci, badi bakonka ne: “Wáfuta mfranga nganyi? Twètù batele mputa, twètù bapongolwelemu maanyi, ne bakutwe nshingi bwa—bwa kukukuba ku mulungù wa mu mashi, ng’assurance wa mushindu kaayi wùdì nende?” Kumpala kwa kwenzabo cintu nansha cimwe, bikengela cilumbu cya mfranga ciikale cijaadikiibwe.

⁶⁷ Kadi padi Mukalenge wetu ùkujìngila munyoololo Wende wa dinanga ku mwoyi webe, ne ukukoka ukupatula mu mukidi wa mpekaatu, Yèyè utu wondopa mwoyi mucibuluke wònsò, uumusha mpekaatu yònsò. Ne kabeji kaa mfranga ya difuta kadi keediibwa mu mbù wa cipwamwoyi, bwa kakuyi dikubalulwila kabidi to kashidi ne kashidi. “Lwâku, kakuyi mfranga anyi kakuyi mushinga wa difuta.” Nansha wèwè mutapike mputa ya milengu ya mushindu kaayi, nansha muzaajike mushindu kaayi, mudi famiye webe mwenze nansha mwikale bishi, anyi cyùdì wèwè mwenze, kakwena kabeji kaa mfranga ya difuta bwa cyôci aci to. Yèyè utu wondopa màsaamà a myoyi, ukuumusha tunyinyanganya twebwe twònsò. “Wakatapiibwa mputa bwa dishipa dyetu dya mikenji, kuzaajibwa bwa bubi bwetu; dinyooka bwa ditalala dyetu dyakapona pambidi Pende; ne ku mibundabunda Yende twâkondopiibwa.” Byònsò abi bidi anu kabiyi bya difuta to.

⁶⁸ Nenku tudi tubenga kuCipeta, bwalu tudi bakookeshiibwe kudi nyuma mubi. Tudi bakookeshiibwe kudi nyuma wa ditunga, nyuma wa pa buloba, pamutu paa kwikala bakookeshiibwe kudi Nyuma wa Nzambi, Nyuma Mwímpè, udi utulombola ne utuludika ku Malelela ônsò, ne uvwija Bible mulelela.

⁶⁹ Kwênjì cikondo, mvwa nyiikilangana ne mwena dyabulu kampanda. Wamba ne: “Anji elaku peebe meeji, Mukalenge Branham. Dikenga dyônsò dya mu nsòmbelu edi, kadi cintu cimwepele citudi naaci, ne tudi basungidiibwe ku cyôcì, cidi anu ndambu wa mifundu ya kale ya beena Yuda eyi’s.”

⁷⁰ “Kaa,” mûngààkambà, “mukalenge, aci ncidi mwa kwikala cyônsò cyûdì wêwè naaci, kadi mêmè ndi ne cintu kampanda cipite aci. Mêmè ndi ne Nyuma wa Mwine wâkaCifûnda awu, udi uCishîndika ne ùCîvwija cilelela, mulayi ne mulayi wônsò.” Kavva yêyè mwa kuumvwa aci to.

⁷¹ Nwamonu’s, bidi bikengela bwa ulwe usumbe kakuyi mfranga, usumbe kakuyi mushinga wa difuta. Kacyena ciyiila mushinga nansha mukese to. Ncya patupu bwa “ewu yônsò udi muswe, alwe.” Nzambi ngudi ukukoka ukupatula mu mukidi.

⁷² Byenze bu muntu uvwa ku ciibi civwabo babiikila ne Cilenga awu. Ûvwa mwediibwe mu mukidi, kubangila anu munda mwa mamwëndè, kudi dyabulu uvwa mumucibwile panshi mu makàsà ende. Wende mushindu wa dilaabuluka uvwa ngwa kulomba kaa pa luse kudi bantu bavwa bapita abu. Nenku pavwaye musòmbe ku ciibi aci dituku adi, yêyè kumona bayiishi babidi baa beena mpenta benda balwa. Kabayi ne dyeyà nansha dimwe to, kadi kwambaye ne: “Argent ncyèna nende to.” Kadi dyeyà paadi’s ki kafranga kaa katambe bukesese kaa argent. “Nî ng’argent nî ngòlò ncyèna naabi to.”

⁷³ Ndi ncinka ne muntu awu wakeela meeji mushindu ewu: “Kabyena ne dikwacisha bwa mêmè kwangata dikopo dyanyi to.” Pàmwăpa yêyè ùvwa ùteeta bwa kwikala kulama ndambu wa mfranga. Ukaavwa ne bidimu makumi anaayi, nenku pàmwăpa ùvwa ùteeta bwa kwikala kulama ndambu wa mfranga, bangangabuka bavwa mwa kumwenzelaku milonda ya balema yibidi, bwa kwikalaye wendelaku, bwalu, yêyè, mu tupombo twende amu mmuvwaye muteketetele. Nenku pàmwăpa bivwa bimukengela kwikalaye ne mfranga, ya kwanji kufutaye, kumpala kwa bangangabuka kumupeeshabo dikwacisha. Nenku ncyà bushuwa ne kabyena ne dikwacisha bwa kwikalaye mukwate dikopo dyende adi kumpala kwa bayiishi baa beena mpenta bavwa kabayi kantu aba to. Mpunga, bòbò. . ùvwa mukese menemene, bwa kwikala ne mushindu wa kupetaku anu dyeyà dyetu dya bushuwa edi kudi biine bantu abu.

⁷⁴ Kadi paakabatangilaye mumpala’s we! Umwe, nsonga ne mwikale ubinduluka ne nsòkà ya bunsonga; mukwabo yêyè, mukulakaji ne mwele ne minyengu; pāvwa Yone. . .

pààkayà Peetelo ne Yone ku ciine ciibi aci apu. Kumonaye cintu kampanda mu mpala wa nsongaalume awu. Mbwena kwamba ne, dibinduluka adi divwa dinene ndambu kutamba dya ciibidilu. Yèyè wakamona mwinshi mwa minyengu ne ntatu amu, bya muunya wa mu Ngaalela awu uvwa mwoshe mulobi mukulakaji awu mumpala ne, muvwa “disanka dya kadiyi kwamba, ne dyûle tente ne butumbi.” Wakamona cintu kampanda civwa cimweka cishiilanganeku ndambu.

⁷⁵ Nudi bamanye’s, kudi cintu kampanda pa bidi bitangila bwena Kilisto, cidi cyenza ne bantu biikale bamweke bashiilangane. Bôbò mbadi batambe kwikala balenga bwa buloba bujima.

Ki kwangataye dikopo dyende ne kudikwataye dituma kumpala.

⁷⁶ Ki mupostolo Peetelo, bu muvwaye yèyè mukulumpe, kwambaye ne: “Nî ng’argent nî ngôlò ncyêna naabi to.” Mu ngaakwilu mukwabo ne: “Ncyêna mwa kukwambulwisha ne kantu nansha kamwe to, bwa kusumba milonda ya balema eyi. Nî ng’argent nî ngôlò ncyêna naabi to, kadi cîndi naaci!” Ûvwa mufume ku disumba kudi Ewu uvwa ne bwîcî ne masanka a mvinyo wa lupandu awu. Ûcìvwa anu ufikilaku, matuku abidi anyi asatu kumpala kwa cyôci aci, ku Mpenta, kùvwà cintu kampanda cyenzeke aku.

⁷⁷ Ki nsongaalume awu kutupikaye ne “amen” wa cikunda ku cyôci aci, ne kumutangilaye mumpala.

⁷⁸ Cyàkenzekà ncinyi? Munyoololo wa dyumvwilangana dya luse awu, luse lwa Ewu wâkamba ne: “Mvwa ne luse bwa babeedi” awu, Nyuma umwèumwè awu ukaavwa mwangate kaaba mu mwoyi wa mulobi mukulakaji awu. Kwambaye ne: “Bwa mfranga kaayi, ncyêna naayi to, kadi ndi ne cintu cîikalà mwa kwangata kaaba kaayi misangu mùllyô mujima. Cîndi naaci!”

⁷⁹ Mpindyewu vulukaayi ne, Peetelo uvwa mwena Yuda, ne bôbò batu banange mfranga, bu pa ciibidilu, kadi ewu mwena Yuda yèyè ukaavwa mukudimune mucima. Kabiyi bya ne: “Cîndi naaci, ndi nkusumbishaci” to.

⁸⁰ Kadi ne: “Cîndi naaci, ndi nkupeeshaci! Cîndi naaci! Ncyêna ne dyeyà mu mpaaya mwanyi emu to. Ncyêna mufwanyine kusumba mulungu wa dyâmpà to. Ncyêna mufwanyine kusumba cintu nansha cimwe to. Ncyêna ne dyeyà nansha dimwe to. Kadi bu wêwè mwa kucyakidila, cîndi naaci, nênkupèèshèci bwalu mêmè paanyi mbacimpeeshe.” Ki cidi citukengela ncyôci aci. “Cîndi naaci, ndi nkupeeshaci.”

“Cyûdi naaci wêwè ncinganyi, mukalenge?”

⁸¹ “Mvwa kwa Ewu udi usumbisha mabeele ne bwîcî awu, kakuyi mushinga wa difuta to. Nênkupèèshèci. Kwèna ne

dibanza dya kumpa mémè kantu nansha kamwe bwa Cyòci aci to. Pawikala mwa kuCyakidila, nènkupeèshèCi. Kabiya byenze bu muntu mufwanyine kukutwila mushinga to, kadi aba badi baswe kufila.”

⁸² Bwalu: “Bu munudi nupeta cyanaana, nufilaayi cyanaana.” Cívwa mmudimu ùkaavwà mubatuma naawu kudi Mukalenge wende, anu matuku asatu cyanaana kumpala aku. “Ndaayi pa buloba bujima, nuyiishe Evanjeeliyo. Ewu wítabuujá ne wabatijiibwa neasungidiibwe; kadi ewu wabenga kwitabuujá neapiishiibwe. Bimanyinu ebi nebifile badi biitabuujá: Mu Dîná Dyanyi bôbò nebiipate baadémons; nebaakule mu myakulu mipyamipya; bôbò banwe bintu bidi bishipangana, kabyakubenzela bwalu to; bôbò bakwate nyoka ne byanza, kayaakubenzela bwalu to. Bu munudi bapete cyanaana, nufilaayi cyanaana.” Mwena Yuda awu ukaavwa yéyè mushintuluke. [Mwaneetu Branham udi utuuta bintu pa cyambilu misangu yinaayi—Muf.]

⁸³ Cidi citukengela mu Amerike ndishintuluka, bwa Nyuma Mwimpè angate kaaba kaa mishingà yetu ya ntendeleelu. “Bu munudi nupeta cyanaana, nufilaayi cyanaana.”

⁸⁴ “Cîndi naaci, ndi nkupeeshaci: Mu Dîná dya Yesu Kilisto wa mu Nazaleeta, juuka wëndè”; diitabuujá mu Dîná dya kadiyi disambakaja dya Mufuki adi! Kabyena bikemesha to paakayaye wenda utupika wela bidya, ne utumbisha Nzambi!

⁸⁵ Kaa, nudi bamanye bintu binene, yéyè ukaavwa musòmbe mwaba awu pámwápa munda mwa bidimu makumi anaayi, uteeta bwa kupetaku mfranga búngi bukùmbàne bwa kusùmbayè milonda ya balema, kadi kayi mwa kuyipetaku to. Kadi anu mu mwaba mene uvwa mutambe kwikala kawuyi wa muntu utekemenaku awu, ne pa dîbà mene divwa kadiyi dya muntu utekemenaku adi, ne kudi bantu biine bavwa muntu kayi mwa kutekemenaku, bávwa kabayi bakumbane abu, yéyè kupeta civwaye ukeba. Mémè ndi ne disanka dya mudi Nzambi ucyenza mu mushindu awu.

⁸⁶ Nenku musùmbà wa bantu bakese, bavwabo babiikila ne mbasantu babunguluki baa mu malaba abu, dilolo kampanda, mémè kupeta cîmvwà nkeba, cívwa mfranga kayiyi mifwanyine kusùmbaku to. Mu musùmbà wa bantu kabayi bamanye mukanda, kabayi balonge kalaasa, bavwale mvwadilu wa balanda, baa Bafiike, twamb’eku twamb’eku, mu cinwinu cikese cya maala cya kale cyàkakùdimunyiibwà mwamwa, panshi apu mu malaba, mémè kupeta cintu cya mushinga, cilengà; pàákantàngilà mukulumpe mufiike awu mumpala, kwambaye ne: “Ukaadi mupete Nyuma Mwimpè kacya wítabuujá anyi?” Kaa, Cívwa ncintu kampanda cîmvwà nkeba. Neivwa mémè mutekemene ne nêncisangànè munkaci mwa bôbò bantu abu to, kadi bôbò mbavwa ne cimvwà nkeba.

⁸⁷ O.N.U. leelu wa Ndaaya ewu, kî mbafwanyineku kwitaba citudi twètù naaci eci to, kadi paaci's ki cidi cibakengela. Khrushchev, ne bakwabo bônso abu, cidi cibakengela n'Kilisto, mu dibatiiza dya Nyuma Mwîmpè. NeCishintulule bilunji byabo. NeCivwije bantu, biine badibo bakina abu, balwa bânà baabo. NeCyumushe lukuka, ne budimu ne dikokangana; ne kuteeka dinanga ne disanka, ne ditalala, bwîmpè ne luse.

⁸⁸ Eyowa's, mu myaba yidi muntu kayiku mutekemene to, misangu mikwabo ki mûdi usangana cyûdi ukeba aci.

⁸⁹ Ncinyi civwa bânà baa Izaleela bafwanyine kwikala bafile (bintu bipawula byônso bya Ejipitu) pavwa mishiku yabo yituuka mashi, pavwa ludimi lwabo lubapatuke ku mishiku apu? S'bavwa bafwanyine kufila ngôlò wabo yônso uvwabo bapawule beena Ejipitu awu, bwa kumushintakaja ne ndambu wa mâyi mîmpè matalale. Balombodi baabo baa mu cipeela abu baakabalombola kuumuka ku ewu mwaba wa mâyi a mu cipeela kuya ku mukwabo mwaba wa mâyi a mu cipeela, kuumuka ku biinîna kuya ku tusulu, kadi byônso abi bivwa anu bikame.

⁹⁰ Pashiishe kulwaku, kakuyi mfranga anyi kakuyi mushinga wa difuta to! Dîyi dyakaakula ne muprofeta dyamba ne: "Akula ne lubwebwe," cintu cidi citambe kwikala cyûme cya mu cipeela, cintu cidi citambe kwikala kule ne mâyi. Kwôkò aku nyoota yabo yakatalajjibwa, kakuyi mfranga anyi kakuyi mushinga wa difuta to. "Akula ne lubwebwe." Kakuyi kufuta lubwebwe to, kadi "kwakula ne lubwebwe."

⁹¹ Yêyè uci di anu Lubwebwe alu diloolo edi. Yêyè udi Lubwebwe mu buloba bûme. Pawikalà mu lwendu mu buloba bûme amu, akula ne Lubwebwe. Kabyena bikengela bwa wêwè kuMufuta to; akula Nende. Ne Yêyè ndikwacisha mene dîdî anuku mu cikondo cya lutatu. Pawikala usaama, akula ne Lubwebwe. Pawikala ne bubeedi bwa mpekaatu, akula ne Lubwebwe. Pawikala muzengele, akula ne Lubwebwe.

⁹² Nwamonu's, byakamweka anu ne bu ôwò mafwanyine kwikala mwaba kampandu. . .Byakamweka ne, piikalaku kakuyi mâyi mu twaba tukese mùvwà tusulu amu, kakuvwa kufwanyine kwikalaku mâyi kuulu kwa mukuna aku to, pabwipi ne lubwebwe apu. Nzambi utu wenza bintu anu mùndàmpàànyima ku bidî muntu udyelela meeji. Lubwebwe, mwaba udi mutambe kwikala mûme awu, kadi Yêyè kwamba ne: "Akula ne Lubwebwe."

⁹³ Leelu wa Ndaaya ewu, bantu mbaseswishibwe bikole. Badi badyelela meeji ne bu bôbò mwa kupatuka kuya kenza masambila abo awu, kufuta nsaserdose kampanda bwa yêyè kubenzelaku ndambu wa masambila, nebifute bwa njila wabo too ne kundekeelu. Bu bôbò mwa kwibaka ekeleeziya kampanda wa munene mu mwaba kansanga, ne muntu mubanji kampanda ucituudila mfranga, biikale anu batungunuke ne kwikala ne

nsòmbelu wa dyalakana, kwambila muntu wa cyanaana bwa ikale yèyè umusambidila, ùdi wela meeji ne abi mbikumbane. Nzambi kî mmuswe mfranga yenu mikooyike ayi to. [Mwaneetu Branham udi utuuta bintu pa cyambilu misangu yisatu—Muf.] Cyònsò cidiYe muswe ndidifila dyebe ne nsòmbelu webe wa kwikala kwakula Nende. Nzambi mmukupe mfranga, kwikadi uyituula ku bintu bidi kabiyi bisankisha mu bulelela to. Ikala uyituula ku bintu bidi bisankisha mu bulelela. Kadi bwa kufila disankishiibwa dilelela, kwèna mwa kudipeta to anu wèwè mwakule ne Lubwebwe.

⁹⁴ Yèyè kutwala mâyi mafidi a mwoyi, kakuyi mfranga anyi kakuyi mushinga wa difuta to. Ki bôbô kunwabo, ne tuumeelu twabo kunwatu, ne bâna baabo balela kunwabo, ne ncutungunuke ne kwikala anu mushimi wa upweka mu cipeela.

⁹⁵ Nenku ki mudibi ne Yèyè udi Lubwebwe alu leelu ewu, mu buloba bûme emu, bwa cisamba cidi cyamba kubutuka. “Ewu yònsò udi uMwitabuuja kaakubutukaku to, kadi neikale ne Mwoyi wa Cyendelele.”

⁹⁶ Monaayi. Diloolo dyònsò, kabivwa bikengela bwa kwikalabo badyela nkonko bwa dyâmpà to. Dyâmpà dyabo bavwa babatwadiladi, diloolo dyònsò, dipyadiya.

⁹⁷ Tudi tuya leelu ewu bwa kupeta mulungu wa dyâmpà. Wèwè mwikale mulombyanganyi wa kaa pa luse, ne ulwa ku diyeeba eku, wamba ne: “Ndi njingaku mulungu wa dyâmpà.”

⁹⁸ Nebâmbè ne: “Anji ndeeje, dyambedi, meeyà ebe Makumi abidi ne ataanu. Ndi ne cya kupeta meeyà makumi abidi ne ataanu bwa mulungu wa dyâmpà ewu.”

⁹⁹ Nenku cyùdì naaci ncinyi paudi uwupeta apu? Eci cidi bu cìdì pambelu pa cyena bwalu ndambu, kadi udi mupete cidi citâmbè bukesa ku cidi blé mwa kupetesha. Badi buumushamu vi—vitamines yònsò, tuzubuzubu twònsò, batupeesha ngulube. Basambakajaku ne ndambu wa musabusabu udi ukwatakaja tuzubuzubu atu pamwe, batusengulula, kadi kwenza mulungu wa dyâmpà, dyanza ne byanza bya manyaanu, bya bukooya, misangu yâbûngì. Nutu numona cinutu nusangana mu mâmpà enu awu, misangu mikwabo, bimòtò bya nsuki, ne bintu bya nsòmbelu wa masandi, ne tutùpà twa nkose, ne bikwabo byònsò bitù bimata mu miine nzubu ya dyenzela mâmpà ayi. Bantu babi biikale ne mäsaaàmà a mäsàsà, ne bikwabo byònsò, bisambakanamu. Bu nwênù mwa kumona mudibi byenjiibwa, kanwena nanshà bafwanyine kubidya to. Kadi, nansha nanku, udi ufuta meeyà ebe makumi abidi ne ataanu awu bwa cyanaana kwèna udipeta to.

¹⁰⁰ Kadi Nzambi uvwa ubadiisha diloolo dyònsò, ne dyâmpà dyanza ku byanza bya Banjelo; kakuyi mfranga, kakuyi mushinga wa difuta. Nenku leelu ewu, dyâmpà adi divwa

cimfwanyi cya Kilisto, Mwoyi wa nyuma, mutuuluke mufume mu Dyulu, bwa kufila mwoyi Wende.

101 Nenku Nzambi udi upeesha bânà Bende, dituku dyônsò edi, dilabula dipyadipya. Nudi bavuluke ne, bôbò balame dyâmpà too ne pavwabu bucyà, divwa ditapila twîshì.

102 Udi umvwa muntu wamba ne: “Ee, ndi ne. . . nênkwambilè. Mêmè ndi Luthérien. Mêmè ndi Presbytérien, Baptiste. Mêmè ndi mwena Mpenta,” aci’s cidi anu mulungu wa dyâmpà dya kale dyenza ne byanza. Ki cyônsò cidiku ncyôci aci bwa bwalu abu, diikale anu dya bukooya, ne dyenza ku byanza bya bantu.

103 Kadi paudi umvwa dilabula dya bujaadiki, dipyadipya dya ne: “Mu dinda emu, mu disambila, Nyuma Mwîmpè mmubatiize musuuka wanyi mu mushindu mupyamupya,” kaa, mwaneetu, s’ki Cyakudya cya Banjelo ncyôci aci. Yèyè udi ubadiisha mu mushindu mupyamupya, dituku dyônsò dicyacya diililè edi, ubadiishila ku Dyulu.

Mvula ya mabenesha nyitudi tukeba.

Mamata a luse adi amata mu nyungulukilu wetu,

Kadi citudi twètù tulomba mmvula.

104 Kaa, eyowa’s, tumaaku panwapa kuumukila ku Dyulu, mu mushindu mupyamupya, Mukalenge, Kilisto Dyâmpà dya Mwoyi. ÛDyèlè mu mwoyi wanyi, ne enzaku nsankile Bwikadi Bwende bunene abu.

105 Ncyà bushuwa ne, bavwa ne kusakidila. Bavwa ne kwanyisha. Ne mulume anyi mukaji kana yônsò udi mulediibwe ku Nyuma wa Nzambi, ne upeta Nyuma Mwîmpè, neikale misangu yônsò anu ne kusakidila. Nansha cinyi cyenzeke, wèwè newikale anu ne kwanyisha.

106 Byenze bu mwânà wa balume mutekete, mpofu awu mu mikuna mwamwa, Benny mwânà awu, mwakalediibwaye. Paakafikaye bukole bwa ngondo mitwe ku mwandamukulu, nsôngà kubangayi kumwenza mu mèsù. Baledi bende bavwa balanda. Bavwa basòmbèlè pa luseke lwa kakuna kaa kale kaa bulaba bwa diima. Nenku bavwa bamanye ne dipanda dya mèsù awu ki divwa mwa kusungila mèsù a Benny mwânà awu, bwa kupetaye mushindu wa kumona. Ûkaavwa mpindyewu kânà kaa balume kaa bidimu bitwe ku dikumi ne bibidi. Baledi bende bavwa bakòkèshe anu bivwà bikumbàne bwa kupetaku anu dyâmpà ne munyiinyi bya kudyabo munda mwa cidimu. Kabavwa mwa kupeta mushindu wa kumupandisha mèsù to.

107 Beena mutumba bônsò, pamwe, kumonabo ne Benny mwânà awu uvwa uteeta kwikala unaya ne bânà nende pambelu apu, mpofu. Kavwa mwa kumona civwaye wenza to. Kuumvwabo luse. Nenku muntu ne muntu, cidimu aci, baakateeka ku luseke ndambu wa bivwabo banowe. Baakavudijaku ndambu

kuditacisha kwa mu midimu yabo ya mu myunya mikole ayi. Nenku paakasumbishiibwa byakudya abi mu movù wa mabeji apoopoka, bôbò kwangata mfranga ayi ne kwelesha Benny mwânà awu mu kàwulù, ne kumutumabo kwa ngangabuka.

¹⁰⁸ Kumupandabo bilenga bya kacya. Nenku mmwenze anu walukila, beena mutumba bônsò kудisangabo mwaba awu pàakatùulukà Benny mwânà ku kàwulù apu. Mèsù ende makese àvwà àbàlakanà awu, avwa akenka. Kubangaye kwela mbila ne kudila mwadi, pavwaye mubatangile mumpala apu.

¹⁰⁹ Umwe wa ku bendeshi baa kàwulù kwambaye ne: “Mwanaanyi wa balume, mbikulombe mushinga kaayi bwa dikupanda adi?”

¹¹⁰ Yèyè ne: “Mukalenge, ncyèna mumanye ne mbatuule mushinga kaayi kudi bantu aba to. Kadi mèmè ndi ne disanka dīngī be bwa bu mūndī mmonaku mpala yabo emu, bôbò mene badi bafute mwine mushinga awu.”

¹¹¹ Mushindu awu ngutudi tudyumvwa. Ncyèna mumanye ne Cyakayiila mushinga kaayi bwa Nzambi to. Ndi mumanye ne Yèyè mmumpe civwa citambe bwīmpè civwaYe naaci, Mwan’Ende wa balume. Kadi ndi ne kusakidila kuvule bwa kwikala ne lumònu lwa nyuma, mu mushindu wa ne ndi mwa kutangila mpala Wende ne kumanya ne Yèyè awu ki wākamfwila. Ncyèna mumanye ne Cyôci aci cyakaMuyiila mushinga kaayi to. Katwena ne mushindu wa kudicinkilaci to. Mushinga mmupitepite bunene. Mèmè ncyèna mufwanyine kunwambila mushindu udiwu to. Kadi ndi ne kusakidila. Ndi ne kwanyisha, kwa ne, musangu kampanda mvwà mpofo, ndi mpindyewu mwa kumona.

¹¹² Ndi ne kwanyisha kwa ne pàākangambilàbo ku lupitaadi lwa ba-Frères Mayo ne cikondo cyanyi ncijike, paakangambila bangangabuka ne ncicivwa mwa kwikala kabidi ne mwoyi, kukaadi bidimu makumi abidi ne bitaanu apu, s’ki mèmè ewu ne mwoyi lelu ewu. Ncyèna mumanye ne mbiyiile Nzambi mushinga kaayi to, kadi ndi ne kusakidila kwa bu mūndi ne mwoyi.

¹¹³ Musangu kampanda wawa mvwa ngènzàmpèkàatù, mu bupika bwa mpekaatu, ne māsāamà a myoyi, mwikale nciina lufu. Kadi, lelu ewu, lufu ki bucimunyi bwanyi. Aleluuyah! Ndufwanyine anu kumfikisha mu Bwikadi bwa Ewu ūndī munange, bwa mpete mushindu wa kuMutangila mumpala. Yèyè ngwākashintulula cintu aci, ku dimpanda, Yèyè kwangata mwoyi wanyi ne kuwuwija mupyamupya. Ndi mumanye ne cintu kampanda ncingenzekele.

¹¹⁴ Mu cibejibeji kampanda mu movù wa mabeji apoopoka mushaale ewu, mu Minnesota, kuvwa mwânà mukese kampanda wa balume wākangata dikalu dyende e kuyaye mu ekeleeziya mu dinda kampanda, mu kalaasa kaa Dyalumingu. Nsongaalume

mukwabo wa beena mutumba, kayiku yêyè bwalu ne kalaasa kaa Dyalumingu to, kwangataye mulunda wende wa bakaji e kuyabo kanaya manayi a kunyeemena mu nêjè ne bisabaata bya tukata. Ne yêyè muntu awu ukaavwa muntu mukole, ki kukabwelaye mu nêjè wa mupepele kadi kudishindamu. Yêyè uvwa museke mwânà mukese wa balume awu mu dinda adi pavwaye wenda upweka ne njila apu, mwambile mulunda wende wa bakaji awu, ne: “Wawa’s ki musumbà wa bakolessi baa maalu badi baya ku ekeleeziya wawa bàba.” Kadi mmwenze anu udishinda mu nêjè amu, mulunda wende wa bakaji awu uvwa usanganyibwa ntanta mule nende. Ûvwa yêyè mupepele; kuyaye kule. Kadi paakajuuka nsongaalume awu ne kateekaye maboko pa dibwe dya mashika, wakakwacika ne mashika, ne wakashaala mulebelele kumutu kwa dibwe dya mashika adi.

115 Mulunda wende wa bakaji awu kuteetaye bwa kafika mwaba uvwaye awu, kadi ùvwa ne bujitu bupite, wenda upanda mabwe a mashika. Nsongaalume kumwelaye mbila ne: “Alukila! Alukila! Neudishindemu cyanaana, ne netutukine tufwe twêtù bônso babidi.” Kwelaye mbila mikole, kudilaye mwadi, kakuyi cintu nansha cimwe bwa kumukwachishaku to.

116 Paanyima paa mutanci, lwà ku lusongo lwa kakuna, kulwaku kaadikalu kakese, kenda kanyenga, mwânà mukese wa balume ne Bible mu dyâpà. Kumvwaye mbila mikole ayi, nenku yêyè kukolesha lubilu ne dikalu dyende adi. Kuteekaye Bible wende awu panshi, ne kuyaye lubilu wenda wendela pamutu paa dibwe dya mashika adi. Kuyaye wenda udikokela mu kaadifu kende kakese amu, ne bilambà byende bilenga bivwaye muvwale abi, too ne mwakalwaye kukwata maboko a mulumyana awu, ne kutungunukaye ne kwenda kumukokela cyanyima, too ne mwakalwaye kumupatula mu dibwe dya mashika amu. Kupatukaye lubilu ne kwimanyikaye mashinyi ne cyanza. Kubiikilabo mashinyi a cyambula-babeedi ne kuyabo nende ku lupitaadi.

117 Paanyima paa yêyè mumane kuya kafuta mfranga ya cyambula-babeedi aci, mufute bangangabuka bwa nshingi yivwabo bamutwe bwa disaamà dya bisulusulu ne bikwabo bivwaye ne cya kwikala mwangate abi, kulwaye kudi mwânà wa balume mukese awu. Kwambaye ne: “Mwanaanyi wa balume, ncinyi cîndiku ne cya kukufuta?”

Yêyè ne: “Nansha cimwe.”

118 Yêyè ne: “Ndi ne dibanza dya kukufuta mwoyi wanyi.” Anji elaaayibi peenu meeji pa bwalu abu. Mfranga kayivwaku mwa kucifuta to. Civwa mmwoyi wende.

119 Mushindu awu ki uvwabi bikengela twêtù kudyumvwa bwa Nzambi. Kabiya bwa kudisumbila njila wetu ne cintu kampanda to; kadi tudi ne dibanza dya kufuta Nzambi mwoyi wetu, bwalu tuvwa tupunga ne lufu ne biikale twenda tutùkina mu mukidi wa

mpekaatu. Nzambi ngudi mwolole maboko Ende ne munjingile muzabi pambidi.

Mvwa ngenda ntukina mu mpekaatu,
 Kule ne mwelelu wa ditalala,
 Munda munyanguke bikole ne makeji,
 Ngenda ntukina bwa nciciyi mwa kujuukamu
 kabidi to;
 Kadi Mfumu wa mbû
 KuumvwaYe mwadi wanyi wa muntu kaciyi ne
 ditekemena awu,
 KumpatulaYe mu mâyi awu,
 Mpindyewu nkaadi mu dikubiibwa.

¹²⁰ Ndi ne dibanza dya kuMupa mwoyi wanyi. Wêwè udi ne dibanza dya kuMupa mwoyi webe. Udi ne dibanza dya kuMupa mwoyi webe, bwa kuMukwacila mudimu; kî mbwa kuwufila, kadi kwikala ukaadi wâtwa eku wâtwa eku wenda uditambisha bwa dingumba dya ekeleeziya wenu adi to; kî mbwa kwikala wâya eku wâya eku wenda ujanangana to; kadi mbwa kuteeta kukwacilangana mudimu ne kusungila bakwabo, ne bwa kubafikisha ku dimanya dya Mukalenge Yesu Kilisto.

¹²¹ Mwânà mutuulavi wa mfranga awu. Bwa kujikija, ndi mufwanyine kwamba nunku. Paakamanaye kutuulakaja byônsò bivwaye naabi bwa kwikalaye udyâ, bya kudi tatwëndè abi, mu nsômbelu wa cimvundu, kadi pakaavwaye walukila kumbelu. . . Ūkaavwa ūlââla mu lupangu lwa ngulube, kadi kwalukilaye mu yêyè. Ki kwambaye ne: “Mbeena mudimu bûngi kaayi, badi naabo taatù wanyi, badi ne bintu bûngi bukumbane ne bipite, kadi ki mêmè ufwafwa ewu, bwa lukengelu.” Ambaayibi tûng bu ne ùvwa muteete kwamba ne: “Ndi ndikonka ne ndiku ne ndambu wa mfranga yîndi mwa kwalujila papa (yîndi mutuulakaje mu lunyaanya eyi)?” Kadi yêyè uvwa mumanye ngiikadilu wa tawëndè, ki kwambaye ne: “Nênjuukè nye kudi taatù wanyi.”

¹²² Tatwëndè kaakambaku ne: “Indilabi tûng, mwanaanyi wa balume! Udi mwalukile ne mfranga yanyi anyi?” to. To. Kaakamufucishaku bwa mpekaatu yende to. Yêyè wakasanka bwa mwakaalukilaye. Wakasanka bwa mwakaalukilaye mu yêyè, bwalu ùvwa mmwanende. Ùvwa mmwanende wa munda mudi nzala. Wakasanka bwa mukaavwaye mu njila wa dyalukila kumbelu. Mpindyewu, yêyè kaakaleeja patooke ne mmwitabe mpekaatu wende awu to, kadi wakasanka bwa mwakaalukilaye mu yêyè ne mwakambaye ne: “Ndi mwenze mpekaatu kumpala kwa Nzambi wanyi, ne kumpala kwa taatù wanyi. Nênjuukè nye kudiye.”

¹²³ Nenku mmwenze anu umumona, mucikàle anu kule, wakanyeema lubilu kuya kudiye ne wakamutwa mishiku. Ki kwambaye ne: “Shebeyaayi mwânà wa ngombe wa maanyi

awu,” kakuyi mfranga to. “Lwâyi ne muzabi wa mutambe kwimpika awu,” kakuyi mfranga to. “Lwâyi ne mpeta awu,” kakuyi mfranga to, “numwelaayi ku munu. Tudyayi, tunwayi, ne tucyonkomokaayi, bwalu mwanaanyi wa balume ewu ukaavwa mujimine kadi mpindyewu wámwêneki. Ukaavwa mufwe, kadi nyewu walu cyakabidi ne mwoyi. Tusankaayi bwa bwalu abu.”

124 Balunda baanyi swayiku ngămbè eci, bwa kujikija. Cintu cimwepele cidi cîsânkishà mu bulelela, bintu bimwepele bilelela bidiku, bintu bimwepele bya bîmpè bidiku, kabyena mwa kusûmbiibwa ku mfranga to. Bidi mapà mafila cyanaana kudi Nzambi, ku Yesu Kilisto: lupandu lwa musuuka; disanka. Lwâyi nudyè, nuukute.

Bwa cinyi nwênù nudi nutuulakaja mfranga ku cidi kaciyi dyâmpà? ne mudimu wenu mukole bwa cidi kaciyi cisankisha mu bulelela? Nteelejaayi ne lukunukunu, ne dyayi...cidi cîmpè, ne lekelaayi musuuka wenu usankile mu bya maanyi.

Inyikaayi maci enu, ne lwâyi kûndi mêmè: teelejaayi, ne musuuka wenu newikale ne mwoyi; ne mêmè nêngênzè neenu cipungidi cya kashidi, nansha mene luse lujalame lwa Davidi.

125 Bintu byônsò bidì bîshààla kashidi, bintu byônsò bidì bîmpè, bintu byônsò bidì byênza disanka, bintu byônsò bidì bya Cyendelelele, mbifidiibwe cyanaana, ne kabyena bikulomba mushinga nansha mukese wa difuta to. Ku ndekeelu wa difunda dya Mukanda ewu, mMwambe ne: “Ewu yônsò udi muswe, alwe kunwa ku Mâyi a mishimi ya Mwoyi, cyanaana,” kakuyi mfranga, kakuyi mushinga wa difuta. Bwa cinyi nudi nutuula mfranga yenu ku cidi kaciyi cisankisha mu bulelela, kadi nulekela bintu bidì bulelela bisankisha, bifila cyanaana, kanuyi nwênù biine nubilama?

Tusambilaayi.

126 Panucidi mu cinyaanya ne mu disambila apa, kudiku, mu citanda emu, mu dinda emu, aba bàtù kabayi banwa ku Mushimi awu, aba bàdì majinga a pa buloba macîkàle mu nsòmbelu wenu, kadi mwikale ujinga bwa kushintulula mwaba webe wa cinwinu, mu dinda emu, anyi mushindu wûdi ukwata mudimu ne mfranga yebe? Udiku mwa kuswa bwa kulwa kusûmba kudi Nzambi, (kakuyi mfranga, kakuyi mushinga wa difuta), bwîci ne mabeele, masanka a mvinyo anyi? Udiku mufwanyine kwela cyanza muulu, kwamba ne: “Wamvulukaku, Mwaneetu Branham, paudi usambila apu” anyi? Nzambi akubeneshe, mukalenge. Nzambi akubeneshe, mukalenge. Nzambi akubeneshe, mwaneetu wa bakaji. Kudiku bakwabo bàdì bafwanyine kwamba ne: “Wamvulukaku, Mwaneetu Branham, paudi usambila apu” anyi?

¹²⁷ Bamwe baa kunudi nwênù bansonga, eyowa's, bàdi batuulakajangane bwenu bumonyi abu. Mê—mê—mêbà akaadi maamù mupicishepicishe mu disambila bwebe wêwè awu, ne papa, dilongesha dyônsò ditu dyenjiibwe kùdi adi, kadi nansha nanku wêwè mubisake ku luseke, bwa kuteeleja manunganyi a dyabulu. Mpindyewu utu ujinga mijiki ya pa buloba, bintu bya pa buloba. Kadi ukaadi walukila mu wêwè, byenze bu mwànà mutuulavi wa mfranga awu mu lupangu lwa ngulube. Udiku mwa kwela cyanza cyebe muulu anyi, mwaneetu wa bakaji, mwaneetu wa balume, ne kwamba ne: "Nzambi, wamvulukaku. Ngaalùjèku mu mêmè, mu dinda emu, lekelaku ndwe ku nzubu wa Taatù"? Kacyena cikulomba mushinga nansha mukese to. Yèyè mmukwindile. Byùdi mwenze nansha biikale binganyi, "Nansha mpeekaatu yenu mikunze kunzuu, neyiikale mitooke tòò bu nêjè; mikunze bu mashi, neyiikale mitooke bu myôsà ya mukooko." Kudiku bàdi mu Bwikadi bwa Nzambi, bàdiku bafwanyine kwela cyanza muulu anyi?

¹²⁸ Aba badi babeedi ne mu lukengelu, bãmbè ne: "Ndi—ndi mupone mu mukidi. Sataana mmu—mmungenzele bibi. Mmuncibwile panshi ne munsaamishe, anyi cintu kampanda. Ndi njinga, mu dinda emu, munyoololo wa diitabuuja wa Nzambi ubwele mu mwoyi wanyi, wikalà mwa kunkoka kumpatula mu mukidi ewu, bu mùvwà muntu uvwa ku ciibi ciwabo babiikila ne Cilenga awu." Elaayi byanza byenu muulu. Nzambi anubeneshe, muntu ne muntu.

¹²⁹ Mukalenge, nyewu nKutwadila, pa dîbà edi, badi beele byanza byabo muulu aba, bwa difwidiibwa dya luse ku mpekaatu yabo. Wêwè ki udi Nzambi, ne Nzambi nkaayeebe. Anu mwaba mwine udibo basômbe mpindyewu awu, ki mwaba mene wùdi Wêwè mwakwile naabo. Ki mwaba mene wùdi Wêwè mubatwishile ne mbapiile, paapeci Dîyì kaaba kaaDi, ne paabangi Nyuma Mwîmpè kwakula, wamba ne: "Udi mupiile. Kudimuka, walukile cyakabidi kudi Nzambi Taatù." Nenku bôbò nyewu bêdi byanza byabo muulu, bwa kuleeja ne mbaswe kupatuka mu lupangu lwa ngulube lwa pa buloba apa elu, bwa kulwa ku nzubu wa Taatù, kùdi tente mu nzubu tente pambelu, kwikalabi kabiyi bikengela bwa bôbò kutwala kantu nansha kamwe to. Anu mudi mwedi wa kasala mwambe bîmpè ne: "Neyêna ntwala cintu nansha cimwe mu byanza byanyi to, ndi anu nshaala kacya ngaakùlama ku nkuruse Webe." Swaku bwa balwe, ne kalolo kônsò, ne didipwekesha dyônsò, ne biikale batwishiibwe, ne baffle nsômbelu yabo. Nenku Wêwè neutwale muzabi udi mutambe kwimpika awu; ne mpeta, bwa kubeelaye ku minu; nenku ubadiishe ne Manà a Mwànà wa Mukooko wâkashiipiibwa awu. Enzaku nanku, Mukalenge.

¹³⁰ Kudi badi basaama ne beena ntatu. Badi mu lukengelu lwa bintu. Sataana nyewu mubélè mu mukidi, kakuyi mpatà to, dipangila dya mfranga bwa kupandiibwabo. Kakuyi mpatà to,

pàmwăpa, bààbûngì baa kudibo kabavwa bafwanyine kwikala bapandiibwe to. Pàmwăpa ngangabuka kavwa mufwanyine kuumusha ciledi cya disaamà to, nansha mene bu ne yêyè uvwa ne mfranga yàbûngì. Kadi Wêwè udi Nzambi. Nenku ndi ndomba bwa ne pa dîbà edi mene, mu dilaabiibwa dya Nyuma Mwimpè udi musombe kaaba aka ewu, bwa Wêwè kwondopa umwe ne umwe wa kudibo. Swaku bwa bondopiibwe, kuumukila anu ku mutu too ne ku makàsà, kantu ne kantu.

¹³¹ Piikalabo kabayi ne disanka; lupandu lwabo, kabàciyi mwa kulusankila kabidi to. Bu mwakamba Davidi wa kale, ne: “Alujulula disanka dya lupandu lwanyi.” Swaku bwa bapete disanka ne dyakalengele, pamutu paa dibungama ne dizengela dyabo adi, bwalu Wêwè udi Lubwebwe mu buloba bûme. Wêwè udi ciikishilu mu cikondo cya mvula wa cipupu. Padi dyabulu ubaasa bubeedi kana bwônsò ne missile, Wêwè udi ciikishilu mu cikondo cya mvula wa cipupu. Biikaleku nanku, leelu ewu, Nzambi, bwalu tudi tulomba nunku mu Dînà dya Yesu. Amen.

Biteketebitekete ne musangeelu wônsò Yesu
udi ubiikila,
Ukubiikila wêwè, umbiikila mêmè;
Nansha mutudi benze mpekaatu emu, Yêyè udi
ne luse lujaalame ne difwilangana dya luse,
Difwilangana dya luse bwebe wêwè ne mêmè.
Alukila kumbelu. . .

¹³² Mpindyewu pawikala ujinga nanku, lwâku ku cyoshelu eku utwe binù, tudi bafwanyineku kusambila pamwe neebe, kukulaaba maanyi, cintu kana cyônsò citudi bafwanyine kwenza aci. Tudi tukujingila difika dilenga.

. . . muzengele, alukila kumbelu;
Ne mwende mwônsò, ne musangeelu wônsò,
Yesu udi ubiikila,
Ubiikila, Èyì ngènzàmpèkààtù, alukila
kumbelu!

¹³³ Nudi baMunange anyi? Teddy, anyisha utupeesheku cyona tûng: “Ndi muMunange, ndi muMunange bwalu Yêyè wakannanga kumpala.” Udi mufwanyine kupeta aci anyi?

¹³⁴ Tùwîmbààyaaku bwa butumbi Bwende, kumpala kwa twêtù kushintulula ndongamu wa disangisha, bwa katanci kakese cyanaana. Ki dikuukwila ndyôdi edi. Mukenji wamanyi kupatuka. Mêmè ndi ne disanka divule bu munwăWâkidîdî. Lombaayi bwa kwikalaWu ne dikwacisha kunudi, bwalu mbingeze mêmè bîmpè bwa kuWamba. Ndi ndomba bwa disonsodiibwa dimwedimwe divwa dimpeebwe mêmè, bwa kunwambilaWu adi, nwênù nudi baWâkidîle mu disonsodiibwa dyôdi dimwedimwe divwaWu mutumiibwe adi. Mukalenge asweku aWubeneshe mu myoyi yenu. Eyo.

Ndi muMunange,

Mpindyewu bwitaayi anu kwîsù cyanaana, patudi twimba apa. Elaayi byanza byenu muulu.

Ndi muMunange

Bwalu Yêyè wakannanga kumpala

Ne wakampetela lupandu

Ku mucu wa Kalvariyo.

¹³⁵ Mpindyewu twinyikaayi anu mitu yetu cyanaana, bwa twêtù kwimbila mu matama. [Mwaneetu Branham wabangi kwimbila mu matama *Ndi MuMunangè—Muf.*] Nudi baMunange anyi? Yêyè kî ngwa cya bushuwa mu myoyi yenu anyi? Kakwenaku cintu kampanda cya pabwaci bwende Yêyè, ciikale anu cya bushuwa menemene anyi? Mêmè ndi muMunange bwalu Yêyè wakannanga kumpala, munkupile nshinga wa Mwoyi ku Kalvariyo, muMupayike ne ndobo ku mwoyi wanyi.

¹³⁶ Kanupu mwoyi to, Mwaneetu Drummond yêyè ki watuyiisha diloolo edi, diloolo dya meesa a Mukalenge. Panwikala banange Mukalenge, nulwayi nwangate meesa a Mukalenge pamwe neetu. Bu Mukalenge mwa kwanyisha, nêngikalè neenu kaaba aka. Yêyè awu mmuku wa Mwaneetu Tony Zabel; Mwaneetu Thom wa ku Afrike; mwanende wa balume, nsongaalume wa maalu malenga; mwîmpè be, mwena Kilisto mushindame, muyiishi mwîmpè wa kânâkânâ.

Bwalu Yêyè wakannanga kumpala

Ne wakampetela lupandu

Ku mucu wa Kalvariyo.

¹³⁷ Patucidi ne mitu yetu miinyika mpindyewu apa, ne pacidi cisanji cya piano citungunuke apa.

¹³⁸ Mukalenge Yesu, nyewu tukaadi pabwîpî ne kubwela mu mudimu mukwabo, Mukalenge. Tudi tuKwela twasakidila bwa Nyuma Mwîmpè wakulwanganyi ne myoyi yetu ewu. Kabidi tudi ne disanka, Mukalenge, dya mûdi Wêwè mutwënzèle cyôci eci. Nenku swaku bwa Dîyî Dyebe kadyalukidi Kûdî kadiyi ne cîdidi dyanze to, kadi Dikumbajeku civwaDi ditumiibwe bwa kwenza. Swaku bwa kushaalaDi mu myoyi yetu yônso, bwa kumanya ne bintu bilelela byônso ne bintu byônso bìdî bîshààla kashidi bidî bifumina kudi Nzambi, kakuyi mfranga, kakuyi mushinga wa difuta to. Bwa cinyi butudi pa dîbà adi bafwanyine kwikala tusubakeena bintu, ne kucivwija cikaadi cilumbu cya lufu apa mwoyi apa, bwa bintu bìikalà mwa kubutuka? Tusubakeeneku nangananga, Mukalenge, bintu bìikalà kabiyi mwa kubutuka abi, bidî kabiyi bya ditwila mushinga wa difuta to. Mushinga mmufuciibwe cyanaana, ne dîyî dituma dya mwakidilu ne: “Ewu yônso udi muswe, alwe.”

¹³⁹ Beneshaku citupa cicidi kumpala cya disangisha edi aci. Enzaku nanku, Mukalenge. Nenku wadisangishaku neetu

diloolo edi. Beneshaku mudimu wa dibatiizangana. Swaku bwa kwikale dipongoloka dinene. Swaku bwa bantu aba, biikalà mwa kubatijiibwa mu Dîna dya Mwan'Ebe munanga, Mukalenge wetu Yesu, swaku bwa buujiibwe tente ne Nyuma Mwîmpè. Swaku bwa bantu aba, badi beelee byanza byabo muulu, bwa kunyingalala, mu dinda emu, ku mpekaatu yabo aba, swaku bwa balwe, babwele mu bilàmbà bya dibatiijiibwa naabi, ne babwele mu ciinà cya mâyi, ciine aci bwa bajaadikile baa pa buloba ne bāfwidiibu luse ku mpekaatu yabo. Nenku bakaadi babatiijiibwa, bwa yôyi kuumushiibwa pa mukanda. Enzaku nanku, Mukalenge.

¹⁴⁰ Ikalaku ne Mwaneetu Drummond diloolo edi piikalaye ututwadila mukenji, mupyamupya wumukila ku Nkwasa wa butumbi apu. Umulaabeku ne Nyuma Mwîmpè. Ne wikaleku neetu patwikala twangata meesa a Mukalenge apu. Swaku bwa myoyi yetu yikale misukula ne mitooke, swaku bwa kakwikadiku dikooyika nansha dya kânà munda mwetu to. Swaku bwa Mashi a Yesu atukezuleku ku mpekaatu yônsò. Enzaku nanku, Mukalenge. Umushaku mâsaamà munkaci mwetu, ne utupeku disanka ne ditalala. Ku Yesu Kilisto nkutudi tulombela nunku. Amen.

Ndi muMunange . . .

¹⁴¹ Nudi baMunange anyi? Mpindyewu elaayaaku byanza byenu muulu kudiYe.

Ndi muMunange

Bwal- . . .

Mpindyewu olola cyanza ulabuleku muntu kampanda udi pabwîpî neebe awu.

Kumpala . . .

(Russell, ndi muMunage. Bu mêmè mwa kufwa leelu ewu, ndi muMunage.)

Ne wakampetel- . . .

Neya bushuwa's, olola anu cyanza ku luseke lwebe aku ulabulangane ku cyanza.

. . . lupandu

Ku Kalvariyo . . .

Eyo, Mwaneetu Neville, ne dîyi dyende yèyè. Eyo.



KAKÜYI MFRANGÀ ANYÌ KAKÜYI MUSHINGA WÀ DIFUTA LUA59-0802
(Without Money Or Without Price)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 2 a ngondo wa mwandamukulu, cidimu cya 1959, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kââdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org